

# **SU BALLITTU CADENZADU**

Gavino Truddaju

*Su ballittu cadenzadu  
ballade, comare mia:  
milligrascias dare dia  
a chie l'at inventadu.*

*Ischirighia! Comare  
non nde tenzedas birgonza:  
ca preideru cun monza  
custu lu poden ballare:  
no est ballu 'e matt'appare  
est ballu chena peccadu.  
Santos l'an aer balladu  
cando fini in custu mundu.  
Millu mi su ballu tundu  
Su ballittu cadenzadu.*

*"Tundu su ballu, perdeul!"  
che-i s'arzola 'e su trigu:  
millu mi su ballu antigua  
chi balleit giaju meu,  
pro render grascias a Deu  
e cun gajja in cumpannia!  
custa si ch'est poesia  
de s'antica zente onesta!  
custa si ch'est sarda festa,  
ballade comare mia!*

*Senz'irgonza peruna  
ballade giovanas bellas!  
Goi ballan sas istellas  
subra s'arzola 'e sa luna  
goi ballat sa fortuna  
cun coas de fantasia!  
Ajò bella, ischirighia!  
che cando fimis minores  
ballemus . A sos mazores.  
milli grascias dare dia.*

*Custu motu, risu e paghe,  
de s'onestade est baldoria:  
goi sa zente antigoria  
balleit in su nuraghe.  
Custu santu faghe-faghe  
pro sos fruttos de s'araadu  
pro tusorzu e porchinadu,  
beniat postu in parusu.  
Da-e su ballu 'e su fusu  
lu den'aer inventadu.*